


www.BibleForChildren.org

Kejadian 3



Uda, Adamdi er ner si tep, Hawa si
sipepra deipu. Hawa pepka deiyoda,
'Anerdi deiprepa, dadeipdanen
baramenganen, amenda kupkameng
nesala yumada, sun gonga kemdina
ner, er pua,' tenepudi,
er si tep Hawa pepu.




Uda, Ila Deiyo Ngebo Allah, er si
Yahwehdi tali bura tara kuramu keca
yala-yala weik ketekepra deipu dinin,
balda pio mali kuna cap, mawa di
inipra kuna cap, pio weik kuramu.
Sun gam kuramu keca yala-yala
yuknge yumada, yambula pua.




Abal aner damai yaudi, aner tep mawa di mok upu pepu. "Allahdi, 'Ne wa pepsa neitamaida, co du yala yuma men jenkamrume,' tek sisi pepu do, gum do?" pepra, mawa di pepu.




Upepupa, anerdi
tamupra pepu. "Gume,
awa neitamai tek
coda, co du dakra jepteneme. Dinino, Allahdi
tek sisi peipseuada, 'Ne wa neitamai tenpu
teku coda, er du dakra men jeptume. Tonda,
aco talena peda, men kuptume. Angeda
meme. Ukupmumnyopda,
tek sisi depkamrerume,'
upepra deipseu," Hawadi
abal tep pepu.




Upepupnen, abaldi
aner tep tamupra mok
upu pepu. "Gume, sun
tek sisi men depkamrume.
Uda, Allah er kaele."



"Aco du dakra jepmem
pangeda, sun kange
tenenange cap, sun
asuru cap dirin kuprepa, laipseryopda,
Allah erda, 'Malinge aca, telepnge aca'
tenen, betapra kael kepra kuretopu,
sun peda kupkamrume.
Adeiyo tep, 'Jena meme,'
pepseu," abaldi Hawa tep
pepu.




Anerdi aco du dipetepudi, utenepu.
'Uo, aco duda, urasin pio telepe.
Tonda aco du jeptenyopda, pio telepe.
Tonda, ange jepnyopda, ila kaele
kemna deiyo keca deipnetue,' tenepu.



Ukupra tenepka tep, aco du
dakra, yambulanun dopra jepudi,
er cap kikiman kuramrei ngebo
Adam tep, bokra karepupa, er
peda aco du yambulanun jepu.



Sun butene jeprei pangeda, adipapu
sun kange doupreidi, asuru epdareidi,
'Uo, nun buteneda, tali nong
banangapu kunmaneme' tenen,
betapra tenepreidi, ali dakrei.




Ali dakreia tep nengeda, pala co bo
dakrapreidi, 'Nun nong singipkunem'
tenen, sun opkal kenengna tep, co
bo sisa wipreidi, singipdongoprei.





Inimberai dinin,
Allah er si Yahwehdi Adam tep, "Kan
dan cei kupmarem do?" pepra kongpepu. Kongpepupa,
Adamdi tamupra pepu. "Gume, kan banmaumumpa,
lelim gekepmanudi, ne nong bananga kunmanudi,
kware kupmanera tep, inipmane," pepu.








Upepupnen, Allahdi, "Ware ngebodi,
'Kan nong bananga kupmareme,' pepmakerpa, kael
kepmaumum do? Nedi, 'Aco tenpupuda, co du dakra
men jenkamrume,' pepkesi co duda, konum dakra
jepmarem do?" pepu.



Upepupa, Adamdi, "Kandi karepnemumpa, amutu
ne cap kikiman kunum nerda, erdi aco du dakra
karepmanupa, yambulanun jepmanue," pepu.
Upepu pangeda, Allah er si Yahwehdi Hawa
tep pepu. "Kanda ware keca deiyo tep,
mali kupmaumum do?" pepra
wenepupane, anerdi, "Gume, baldi
upu mawa di pepmanupa, mangkau
di teka tenepmanudi, aco
du dakra jepmanue,"
pepu.





Ange tep nengeda, Allah er si
Yahwehdi, Adam cap, Hawa cap
tep, 'Amutu pio men kunkamreng'
tenen, Eden ban mutu wa neitamai
di dopra, bura tara dokotepu.






Ada, 'Tuai di dopra ketekepsi ngebo
cadi, tali tuai mutu neitamaipu pio
pel donkamre' tenen, Eden ban
mutu bura dokotepu.






Bura dokotepudi, im deiki kure keca,
er sida Kerub dopra, Eden ban dinin,
keteng yakan tara deipupa,
angebodi uku bu jerepa dirin
weik kuramretopu, dirin weik
kwamu parang
ya dopra, . . .






... yu biringnapu kuramudi,
kalengnapu kuramu. Ada, 'Nimi tuai
nesaladi, Gam Kuna Deiyo co du
ban bisi yakanung' tenen,
kalengnapu kuramu.



Adam cap, er ner Hawa cap, kikiman kuramreiyanen,
nyakdareipa, Hawa mundu douamnganen, amendada
er mi deipudi, "Allah er si Yahwehdi, meliamneua deiki
di, ami deipmana tep, er sida Kain,"
pepu.





Sun dakuramyane, amenda yuk taruda, ami er weit bo ton deipudi, er si tep Habel, pepra deipu. Nepbaramrei panenda, Habeldi nimi pein keca, domba bisam talepra peiramu dinin, Kainda tali wa pena cap, kouna cap pel doramu. Gam kure keca peina gume.




Sun yuma dakuramipane, Kaindi, 'Allah er si Yahweh,
er gispal dona tep, ne kouamsi keca neitamai di dopra
karepkune,' tenepudi, er wa kouamu keca
kipra kareryau.




Dinino, Habel erda, tali keca gum dinin, er peiramu domba bisamdi deipunge, weni domba nyapu popra galepudi, pio telep tu cap, meta cap, weiknge dopra kareryau. Kareryaupa, Allah er si Yahwehdi Habel er duyanmau keca tep dipetepudi, Habel cap, akeca cap tep, kange deipu.



Dinino, Kaindi duyanmau keca cap, Kain er nong
cap tep, Allah dipetepudi, kange men deipu.
Kange men deipka cadi, Kain kael kepudi,
yu weik kupupa, er urasin
genepdongonmau.




Upepu dipunen amendada, Kaindi er weit bo Habel tep, mawa di pepu. "Weito, kan cap nun bura tali benkaneme," pepupa, banmareiyanen, bura mutu neitamai kunmarei taruda, Kaindi er weit bo sisa Habel tep, bongoprapudi, poptapupa, Habel depu.



Ukupupa, Allah er si Yahwehdi, Kain tep asipetepu.
"Kan weit bo Habela, dan cei kunmar do?" pepra
asipetepmaupa, Kaindi, "Jo, ne walwale. Neda ne weit
bo Habel, er kalekra dina deiyo ngebo kunmana tep,
aupu pepnerem do?" pepra iniptapu.



Ukupu pangeda, Kaindi Allah er si Yahweh, er kuramngai tapra, bura tara mutu, er sida Nod mutu bena kuramu. Nod mutuda, ada Eden ban mutu dinin, ortara keteng yakan tara kuramu.




Amenda taru Adam cap, Hawa cap kikiman
kuramreipa, Hawadi sal mi ton deipudi, er si
tep Set pepra deipu.




Asi pepka deiyoda, 'Kaindi ne mi Habel
poptapneupane, er yo pununa tep, Allahdi
melipneupa, ami konum karepmanere'
tenepudi, er mi sida, Set pepu.




Adamdi er mi Set konum deipkopda, adinin dipra,
keteng tamun denge weik 800 tahun ton cap kuramu.
Ataru neitamai ton, yuk nyapu cap, yuk ner
nyapu cap deriramu. Adam er gam kuramu
keteng tamun yumada, denge weik 930
tahun kuramudi, depu.




Nimi tuai nesala ban-ban yumadi, sun kange
dipru neitamai tenerami keca yuma pio
malipu kurami.




Ataru-ataru yuma, telep keca tenena gum
dipapu, pio mali kecapu tenepra
putaramupa, mali-mali pio weik
kupbarami. Malipu kurami ngeda,
Allah er si Yahwehdi dipetepudi,
kael keamu.




"Nimi tuai nesala ketekepra deipsidi, tuai mutu
neitamai deipsada, gum kupra deipnepa,
tuai mutuda tali dempu kunkamre.
Tonda, nimipu gum dinin, nerapu
cap, tuai deiki embare gam kun
keca yala-yala
yuma cap, . . ."



“ . . . po cap, bal cap, ma cap, akeca yala-yala yuma cap, gum kupra deipkamne. Akeca-keca yuma ketekepra deipsada, dabal weik kunerepa, mali kange doupne,” Allah er si Yahwehdi pepu.



Allah er si Yahwehdi tuai nesala yuma tep, angepu
teneramu dinin, Nuh er tenpu tep nengeda, mali
men kuramnga cadi, er kuramu keca
dipetepudi, kange deipu.




Nuhdi deiamu nyapuda, weneri
deriramu. Sun sida, Sem cap,
Ham cap, Yafet cap si pepu.



Allahdi teka tenena nesala yuma tep,
gam pio kupra deipkamsera deiyoda
pepkusene. Ada, Allahdi nesala ban-ban
yuma tep, bicau teneamseudi, dipru
weika di kareamseua tep, er Mi
Sisa tenpupu kuramu dinin,
tuai nesala lyemna tep
karepseue.



2




60



Ada, 'Ware nesala do yuma, er Mi Sisa
tep, teka tenepmengopda, pio men
depkameng dinin, gam kuna deiyo keca
karepnepa, pio gam kunkameng'
tenen, er mi tenpu karepseue.



2



60



Roma 3:23 Nesala ban-ban yumada utotopu kunupe. Allah er tenpupuda mali keca tenpu pe men kuredi, pio dumsisipu kuretopu men kunupe. Nunda er upu yaniptapmepedi malipu kunupe. Allah pio telep kupra kuretopu, men kunupe. Nunda dumsisi men kupmanto nesala kunupe. Atep tuai mutu kupe nesala yumada kikiman utopu lyemserure.

Roma 6:23 Angeda tali men pepsene. Deiyoda pepkusene. Ada, nundi menenga keca dorona tep, pel dopmepepa, sun pel deiyo nengdi menenga keca, co bo karesenungtopu, mali kun kecapu tenepira, pio malipu kupbaramepyopda, sirya taruda depkamepe. Depmepyopda, Allah cap kikiman pio men kunkamepe. Dinino, Allah bicau teneseredi, er kange dipu tali karesere kecada, pepkusene. Ada, nun Deiyo Ngebo Yesus Kristus cap, dipru dukdongopseua deiki di, sirya taruda gam bukra deipserepa, Allah cap pio gam kunkamepe.



Ibrani 9:27 Uda, Allahdi nimi tuai nesala yuma teneamseutopu kunkamepe. Ada, gam kuramepyanen, tenpu taru di konum depmepyopda, amendada, Allahdi, nun tuai nesala yuma tep, "Ange telepe, ange mali," pepra upu lepsisikra bokeipseredi, wenepkamsere.

Efesus 2:8,9 Allah er kange dipapu lyepseue pepmasenada, tali tep men pepsene. Deiyoda ake. Sundi Allah tep, konum teka teneprema deiki di, Allah er kange deiki dipapu lyemserure. Angeda, sun telep pel dopra, dumsisi kuruma deiki di men lyemserure. Ange pio gum dinin, Allah er kange dipapu bicau tenepseudi, lyepseue. Er kange dipapu lyemserurada, 'Mesum dipapu teka tenena deiyo keca karenepa, anesaladi teka tenepnetenge' tenen, karepseudi, kange deipra lyepseue. Ange utopu ton tupa kuserure.



Nunda telep pel doramupka deiki di men Iyepseua tep, ware ngebo do yuma, sundi, "Gume, ne telep pel doramsa deiki di, Allahdi Iyepneue," pepra gemena upu men peptenge. Ada men pepmanto keca tepa.

Roma 10:9,10 Aupuda, pepkusene. Ada, sun pe upu deiki cap, sun pe sipyal deiki cap dipapu, "Yesusda tek sisi nun Ila Deiyo Ngebo kurure," pepra, tenimtona gum dipapu, katuai di pepmum dinin, sun kange dipru neitamai di, 'Yesus konum depu dinin, Allahdi Yesus tep tek sisi ka tamupra gam bukra deipu' tenen, teka tenepmumnyopda, konuma, tek sisi Allahdi Iyepkamsere. Angeda tali tep men pepsene. Gume. Deiyoda ake. Ada, sun kange dipru neitamai teka tenepmumnyopda, Allahdi sun tep, "Sunda dumsisi nesala kununge," pepra, er kange dipapu telep kemdiserure.



Tonda, sun pe upu deiki cap, sun pe sipyal deiki capdi,
"Yesusda nun Deiyo Ngebo kuserure," pepra nimi gekenai
di, katuai pepmumnyopda, Allahdi Iyemdoserure.

Yohanes 3:16,17 Allahdi teka tenena nesala yuma tep,
gam pio kupra deipkamsera deiyoda pepkusene. Ada,
Allahdi nesala ban-ban yuma tep, bicau teneamseudi, dipru
weika di kareamseua tep, er Mi Sisa tenpupu kuramu dinin,
tuai nesala Iyemna tep karepseue. Ada, 'Ware nesala do
yuma, er Mi Sisa tep, teka tenepmengopda, pio men
depkameng dinin, gam kuna deiyo keca karepnepa, pio
gam kunkameng' tenen, er mi tenpu karepseue.
Angeda tali tep men pepsene. Allahdi er Mi Sisa dopra, tuai
nesala kunupai dokotepseua deiyoda, 'Erdi tuai
nesala yuma tep, wenepa poptapkamre'
tenen, men dokotepseue.



Ange gum dinin, Allahdi, 'Ne Mi dokotepnepa, nimidi er tep teka tenepmenga deiki di, nesala ban-ban yuma neitamai di nesala weik lyepkamne,' teneamudi er mida, tuai nesala kunupai dokotepupa, nun damai yaue.

1 Yohanes 5:11-13 Allahdi er Mi Sisa tep, lap pepra karepseu upuda ake. Allahdi pio gam kuna deiyo keca konum karepsue. Agam kuna deiyo kecada, er Mi Sisa Yesus deiki dipu kareserure. Allah er Mi Sisa Yesus teka tenepra talere ngeboda, gam pio kunkamre. Allah er Mi Sisa Yesus teka tenena gum di, Yesus men talere ngeboda, gam pio men kunkamre. Ato ngeboda, nong yopu kurura tep, Yesus er cap kikiman gam men kunkamrengé. Uda sunda, 'Allah er Mi Sisa teka' tenen, talepra kurum nesalada, 'E, nunda tek sisi gam pio kunkamepe' tenen, 'Kange bongtona gum di, tek sisi kael keprumudi, dipru dimpepra kunkamrum' tenen, ne Yohanesdi sun tep, aupu sekeipsene.



Kejadian 3 – 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot; Tammy S.

Ketengban Bible (xte) ©2022 Wycliffe Bible Translators, Inc

<https://www.bible.com/bible/3486/GEN.1.KNTOT>

©2026 Bible for Children, Inc.

www.M1914.org

www.bibleforchildren.org

